

LA  
PRISE  
DE LA VILLE  
DE REALMONT.

Ensemble le nombre des Capitaines  
& Soldats qui ont esté tuez.

*Avec les ceremonies observées, tant à la  
celebration de la Saincte Messe,  
que Procession generale faite  
en ladite Ville.*

Par Monseigneur le Prince.



A PARIS,  
De l'Imprimerie de JEAN BARBOTE,  
en l'Isle du Palais, rue de Harlay,  
à la Fleur de Lys Couronnée.  
M. D. C. XXVIII.

*Avec Permission.*

*Iouxtela copie imprimée à Tholose,  
Par la veufue de I. Colomiez, & R. Colomiez.*

Case

F

39

.326

1628 mai

## PERMISSION.

**I**L est permis à Iean Barbote, Maistre  
Imprimeur & Libraire en ceste ville  
de Paris, d'imprimer ou faire impri-  
mer, vendre & distribuer *La Prise de*  
*la Ville de Realmont, &c.* Et defen-  
ses sont faites à tous autres Imprimeurs  
& Libraires de l'imprimer, ny vendre.  
Fait le treiziesme iour de May mil six  
cens vingt-huict.





*LA PRISE DE LA VILLE  
de Realmont, par Monseigneur  
le Prince.*

**M**ONSEIGNEUR le Prince recherchant avec tout le soin possible, les occasions de servir utilement le Roy, & l'Estat, par les armes que sa Majesté luy a mises entre les mains en ses Prouinces: Apres auoir heureusement, & par sa diligence naturelle reduit la ville de Pamies à l'obeyssance du Roy en vne saison fort peu conuenante à telles entreprises, iugea qu'il ne pouuoit rien faire

de plus important au bien public, & à la ruine des rebelles, que d'empescher (en prenāt les places qui sont aux montagnes de Castres & Geuaudan) le retour du Duc de Rohan au haut Languedoc. Et à cet effect partit de Tolose avec cinq canons pour venir en Albigeois, y faisant en mesme temps acheminer les troupes qu'il auoit encores laissées dans le Comté de Foix, & arriva à Alby le Samedi quinziesme du mois d'Auril, où il trouua encores deux canons, & toutes autres choses necessaires, comme il les auoit fait preparer pour l'execution du dessein qu'il projettoit. Et cognoissant combien la ville de Realmont importoit à l'effect de son entreprise, il enuoya Messieurs du Bourg & de Ragny Mareschaux de camp, avec vne bonne partie de l'armée le lundy dix-septiesme, pour recognoi-



estre la place, selon le rapport desquels  
 le lendemain il donna rendez-vous à  
 toutes ses troupes au dessous du Cha-  
 steau de Lombez à demie lieuë de  
 Realmont, où il leur fist faire monstre  
 & recogneust ou par soy-mesme, ou  
 par ses Mareschaux & aydes de camp  
 de combien d'hommes il pouuoit faire  
 estat pour le siege qu'il entreprenoit,  
 qui se trouuerent enuiron six mille ef-  
 fectifs dans l'infanterie, & trois cens cin-  
 quante de caualerie. Le Mercredy dix-  
 neufiesme au matin les approches se  
 firent du costé de la montagne: car ce-  
 ste ville est assise dans vn vallon tres-  
 fertile, arrosée deuers le Soleil leuant  
 d'vne petite riuiera, & à l'opposite est  
 vn costau où est vn tres-beau vignoble  
 lequel est distant de la ville de la portée  
 d'vn mousquet, sur lequel les ennemys  
 auoient commencé vn petit fort, que

les nostres emporterent d'abord, avec  
 perte de deux Capitaines l'un du regi-  
 ment de Normãdie nommẽ du Breuil,  
 l'autre nommẽ du Verger, de Hauran-  
 ne, de Bayonne, hommes hardis & de  
 grande conduite, du regiment de Fal-  
 cebourg, & quelques trois ou quatre  
 soldats blesez, en estant demeure sept  
 ou huit des ennemys sur la place: dẽs  
 ledit iour la place fust entierement in-  
 uestie, bien qu'elle soit assez grande, fai-  
 sant la ville, & la nouuelle ville pres-  
 que vn quarrẽ parfaict, ayant trois à  
 quatre cens pas de face d'enceinte de  
 muraille, sans les bastions, cornes, &  
 contrescarpes de terre dõt elle est cou-  
 uerte de tous costez. Bref c'estoit vne  
 des meilleures places qu'eussent les Re-  
 ligionnaires. Les approches estant heu-  
 reusement faites le Ieudy pendant  
 que les canons, & les munitions ar-



fluoient d'Alby, on commença à ou-  
 urir les tranchées de trois endroits,  
 celles où les regimens de Norman-  
 die, Falcebourg & Vioules faisoient  
 garde, tiroient du costé où estoit le-  
 dit fort, commencé au bastion qui  
 couuroit la Porte de l'Hospital, &  
 qui fut iugé le plus facile, & le plus ne-  
 cessaire à gagner: celles des Regimens  
 de la Moliere, Sainte Croix & l'Es-  
 cure prenoient d'une autre Monta-  
 gne, en tirant à un Bastion qui estoit  
 à un des coings de Ville-Nouvelle, de  
 mesme costé que ladite Porte de l'hos-  
 pital: les autres du Regiment d'Am-  
 brez commençoient dans la plaine,  
 pour venir à un autre Bastion deuers  
 la porte Saint Anthoine. Ces travaux  
 s'aduançans ainsi de iour en iour, avec  
 peu de perte, trois Batteries de sept Ca-  
 nons saluerent les ennemis le matin

du iour de Pasques , avec estonnement  
 pour eux , & cry d'allegresse partout le  
 Camp , & continuerent cinq ou six  
 iours, vn peu lentement sur la fin, pour  
 les defauts de munitions que Mon-  
 seigneur le Prince faisoit amener de  
 Narbonne avec trois Canons de bat-  
 terie , & vne Couleurine , & que les  
 chemins rompus & pleins de Monta-  
 gnes empeschoient d'arriuer si tost  
 qu'on auoit promis. Et encores sa  
 presence & vigilance ordinaire les fit  
 rendre au Camp deux iours plustost  
 qu'ils n'eussent faict. Depuis le Diman-  
 che iusques au Vendredy par le soin &  
 diligence de mondit Seigneur, de Mes-  
 sieurs les Mareschaux & Maistres de  
 camp les tranchées furent menées au  
 bord des fossez, & le mesme iour à  
 deux heures apres midy Monsieur le  
 Marquis de Ragny fist ouurir celles  
 qui



qui tiroient au bastion de la porte de l'Hospital, où pour lors le Regiment de Falcebourg estoit en garde duquel il choisit des soldats, & en print vingt ou vingt cinq qu'il fit sauter dans le fosse de hauteur d'une toise couverte de balles de laine avec des gabios & barriques pour se loger & attacher audit bastion. Ce qu'ils firent courageusement à la faueur du canon & des mousquetades qu'on tiroit de toutes parts des tranchées, & particulièrement d'une redoute si auantageuse pour nous, que les ennemys ne pouuoient demeurer dans ledit bastion, sans estre entièrement descouverts de ceste eminence. En toute ceste escarmouche nous n'eusmes que deux soldats tuez, & cinq ou six de blessés. Monsieur le Marquis de Ragny qui fit faire tout ce travail, & Monsieur le Marquis de Nangys,

qui sont tousiours dans la trenchée pendant ce combat, eurent leurs chapeaux percez de l'esclat d'une grenade qui tomba sur leurs testes. Le soir du mesme Vendredy Arnaudin estant aux trenchées avec ledit Regimēt de Vioules, qui auoit releué celui de Falcebourg, obtint de Monsieur le Marquis de Ragny, qui y estoit encore pour lors d'attaquer ledit Bastion pour se loger sur la pointe où dix ou douze de nos soldats blesez, & ledit Arnaudin couuert de pierres se retirerent à cause des grenades que leurs ennemys leur iettoient d'une pallissade, de laquelle ils estoient couverts dans le logement qui auoit esté fait de iour, d'où ils s'auancerent à la sappe presque iusques au dessus, sans perte que de six des nostres, & quelques blesez: Icy Monsieur du Bourg receut vne mousque-



eade dans le bras qui ne perça que  
 son pourpoint, ayant eu le iour aupara-  
 vant son cheual blessé sous luy.  
 Cependant les trois canons de Nar-  
 bonne furent mis en batterie de plein  
 iour avec les sept autres, & com-  
 mencerent tous sur les quatre heures  
 du soir du Samedy vingt-neufiesme  
 à battre ledit bastion de la porte de  
 Saint Anthoine, les deffences des  
 autres, & les courtines avec telle  
 promptitude & violence, que les en-  
 nemys effrayez de ce bruiet, & des  
 mousquetales, dont ceux du Regi-  
 ment de Normandie, qui ce soir  
 là entra en Garde, les escarmou-  
 choient, sans leur donner relasche, ils  
 enuoyerent vn Cartel à Monseigneur  
 le Prince, par vn Tambour, pour ob-  
 tenir quelque honorable compo-  
 sition, lequel n'estant point signé, Mon-

seigneur leur fit faire responce de mesme, sans le signer, par Messieurs les Marechaux de Camp, cependant qu'on tenoit toutes choses prestes pour le Dimanche de bon matin faire l'attaque, laquelle ils preuindrent par vn autre papier signé de Maugis, Gouverneur, & des principaux habitans de la Ville, par lequel ils requeroient Monseigneur le Prince de les receuoir à composition: Ce qu'il leur accorda, avec sauf-conduit, pour les Deputez qu'ils enuoyerent à cet effect, lesquels vindrent quatre dans la place: le premier Consul nommé Douarel, vn des Capitaines qui commandoit, & deux des principaux habitans, avec Lettres & Articles; Ausquels mondit Seigneur ayant assemblé le Conseil, fit responce, & les receut à composition: qu'ils accepterent libre-



ment ; s'estant contenté de faire demolir les murs , portaux , Tours & Bastions , les faire razer entierement, combler les fosses , & prendre le serment de tous de ne plus porter iamais les Armes contre le Roy. Et sortirent tant de gens de guerre , que d'habitans , six cens hommes , avec escorte de deux Cornettes de Cauallerie. Monseigneur le Prince voulut encore luy-mesme en prendre la peine , & les conduisit iusques à vn quart de lieuë, afin qu'il ne leur fust meffaict : pendant que Messieurs les Marefchaux de Camp donnerent l'ordre necessaire dans la Ville , y faisans entrer six compagnies de Normandie, souz la conduite de Monsieur de Maniquan, Maistre de Camp dudit Regiment. Le lendemain , qui estoit le premier de May , Monseigneur le Prince fit

chanter le *Te Deum* dans le Temple,  
 & celebrer la Sainte Messe, d'où elle  
 estoit bannie depuis soixante ans. Ce-  
 ste Ville estant la premiere du Lan-  
 guedoc qui auoit receu les faussetez de  
 l'heresie de Calvin, La Procession se  
 fit aussi dans la Place, où Monsieur  
 l'Euesque d'Alby portoit le Saint Sa-  
 crement souz vn Poile, que mondit  
 Seigneur le Prince, Messieurs les Mar-  
 quis de Ragny & de Nangys, & Com-  
 te de Carlus, portoient, suivis de quan-  
 tité de Noblesse, avec vne louable de-  
 notation. Pendant tout ce Siege, qui  
 dura douze iours, nous n'auons perdu  
 que vingt six ou trente des nostres,  
 & autant de blesez, en estant mort  
 des ennemis cent ou six vingts, com-  
 me eux-mesmes l'ont depuis confessé,  
 & entr'autres deux Sergens, & vn  
 Lieutenant, dont ils faisoient grand



estat; Ce qu'ils disoient les auoir particulièrement obligez à se rendre: outre qu'ils auoient perdu tout espoir de secours, à cause de la bonne & seure garde que fit pendant tout ce temps nostre Cauallerie, qui fit desister Saint Germier avec quatre ou cinq cens hommes qu'il auoit amassez. d'une entreprise si hazardeuse qu'il tenta plusieurs fois sans oser se mettre en peril & perte si euidente. Et neantmoins contre la foy donnée la plus part desdits soldats, se sont rendus dans la ville de Castres, qui se reuolta de desplaisir de voir la prosperité des armes du Roy.

F I N.

